

LE CHAPITRE DES PROPHETES

contenant cent douze versets,

escriit à la Meque.

AV nom de Dieu element & misericordieux. Le iour s'approche que le peuple rendra compte de ses actions, mais il n'y pense pas & s'éloigne des commandemens de Dieu, s'ils les escoutent, ils s'en moquent, ils ne les comprennent pas, & tiennent leurs mauuaises intentions secretes. Mahomet n'est-il pas homme comme vous? direz-vous que c'est vn Magicien? vous voyez le contraire; Dieu entend tout ce qu'on dit au Ciel & en la Terre, & sçait tout. Ils disent, certainement Mahomet a songé ce qu'il dit, il l'a controuué, il est vn Poëte, nous ne le croirons pas s'il ne fait paroistre quelque miracle comme ont fait les Prophetes qui l'ont precedé. Nous auons exterminé plusieurs villes, parce que leurs habitans estoient incredules, nous n'auons enuoyé auparauant toy que des hommes qui ont esté inspirez de nous; demandez-le à ceux à qui a esté cy-deuant donné la science de la loy escriite si vous ne le sçavez pas, ils ont esté hommes qui beuuoient & mangeoient & estoient mortels, nous auons effectué ce que nous leur auons promis, nous les auons sauuez avec ceux qui ont

crû, & auons exterminé les incredules; Nous vous auons enuoyé vn liure pour vous instruire, le comprendrez-vous? combien auons nous exterminé de villes infidelles? combien auons nous estably de peuples nouveaux en leur place? Lors qu'ils ont senty nostre punition ils ont pris la fuitte, ne fuiez pas & retournez vers ce qui vous a esté agreable, retournez en vos maisons, peut-estre que vous souhaiterez encore les richesses de la terre. Ils ont dit, malheur est sur nous, nous auons tort; Ils ont parlé de la façon, iusques à ce qu'ils ont esté exterminés. Nous n'auons pas créé le Ciel & la Terre, & tout ce qui est entr'eux pour s'en joier, si nous eussions voulu qu'on s'en fut mocqué en terre, on s'en seroit mocqué au Ciel; au contraire i'oppose la verité au mensonge pour le confondre, & en effet elle le confond. Malheur vous arriuera à cause de vos blasphemes, tout ce qui est au Ciel & en la Terre est à Dieu, les Anges n'ont pas honte de l'adorer, ils le louent iour & nuit, & exaltent sa gloire sans blaspheme. Les infidelles adorent des Dieux faits de terre; ont ils le pouuoir de créer quelque chose? s'il y auoit au Ciel & en Terre vn autre Dieu ils ne s'accorderoient pas, loué soit Dieu Seigneur de l'Vniuers, ce que racontent les infidelles n'est pas veritable: il ne demande point de conseil lors qu'il veut faire quelque chose comme font les hommes, adoreront-ils vn autre Dieu que luy? Disleur, apportez vos argumens, voila ce que nous auons à vous

dire, voilà nos raisons & celles de nos prédecesseurs, certainement la plus grande partie d'entr'eux ne cognoit pas la verité & s'en esloigne. Nous auons inspiré à tous les Prophetes que nous auons enuoyez, qu'il n'y a qu'un seul Dieu qu'il faut adorer. Ils ont dit, croyez-vous que les Anges soient enfans de Dieu? Loüé soit Dieu, au contraire, ils sont ses creatures, il les ayme, ils ne parlent qu'apres luy, & obeissent à ce qu'il leur commande, il sçait tout ce qu'ils ont fait, & tout ce qu'ils ferôt, ils ne prient pour personne sans sa permission, & craignent de luy déplaire; Qui dira entr'eux, ie suis Dieu au lieu de Dieu? il sera precipité dedans le feu d'Enfer, ie traite ainsi les infidelles; ne sçauent-ils pas que les Cieux & la Terre estoient fermez? nous les auons ouuerts, & auons donné la vie à toute chose par la pluye que nous auons fait descendre, ne croiront ils pas (en mon vnité?) Nous auons créé des montagnes pour empescher la terre de se mouuoit; nous y auons fait des chemins larges & spacieux pour nos creatures, nous l'auons couuerte du Ciel & l'auons exemptée de cheute, neant moins ils mesprisent nos commandemens. C'est le Seigneur qui a créé le iour & la nuit, la Lune & le Soleil, tous le loüent & l'exaltent dans le Ciel; nous n'auons créé personne pour demeurer eternellement en terre, les hommes gousteront tous la mort, ie vous esprouueray par le bien & par le mal, & serez assemblez deuant moy pour me rendre compte de vos actions: Les

infidelles se moquent de vous lors qu'ils vous voyent, & disent, voila ceux qui se moquent de nos Dieux: Ils n'obeissent pas au commandemens de Dieu, il a creé l'homme de bouë, & vous fera paroistre les effects de sa toute-Puissance, ne soyez pas en impatience de voir la punition des impies qui disent, quand sera le iour du Jugement? s'ils le sçauoient, ils esloigneroient le feu de leurs dos & de leurs visages, ce iour les surprendra, il les estonnera lors qu'ils y penseront le moins, ils ne le pourront pas retarder, & seront priuez de protection. Certainement ils se sont moqué des Prophetes qui ont esté enuoyez auparauintoy, mais ils ont esté punis selon leurs demerites. Dis leur, Qui vous conserue iour & nuit autre que le misericordieux? neâtmoins vous abjurez ses commandemens; Ont-ils vn autre Dieu que moy qui les puisse sauuer? leurs Dieux ne se peuent pas deffendre eux-mesmes, ie ne les protegeray pas, neantmoins ie les enrichiray comme i'ay enrichy leurs peres, & prolongeray leur vie pour les chassier en terre? ne cognoissent-ils pas que leurs estats diminuent de tous costez par ces conquestes? est-ce ainsi qu'ils sont victorieux? Dis leur, ie vous presche ce que Dieu m'a inspiré, mais les sourds n'entendent pas les exhortations qu'on leur fait; lors qu'ils sont vn peu touchéz des chastimens de Dieu, ils disent, O malheur? nous auons tort & sommes injustes; le peseray leurs ceures au iour du Jugement pour ne faire injustice à

personne de la pesanteur d'un grain de moutarde,
 & compteray tres-exactement. Nous auons don-
 né à Moïse & à Aaron le liure qui distingue le bien
 d'avec le mal, & leurs auons commandé de pres-
 cher nos commandemens à ceux qui ont nostre
 crainte deuant les yeux. Ce liure est benit, & est en-
 uoyé de nostre part, neantmoins les infidelles l'ab-
 jurent & le condamnent. Nous auons cy-deuant
 enseigné le droict chemin à Abraham, & auons
 cognu qu'il estoit homme de bien. Souuiens-toy
 qu'il a dit à son pere & à ses gens, quels Idoles ado-
 rez-vous? ils ont dit, nous auons trouuez nos pe-
 res qui les adoroient, il leur a dit, vos peres & vous
 estes grandement déuoyez; ils ont dit, Nous dis-tu
 la verité, ou si tu te joië? Il a dit. Certainement vo-
 stre Seigneur est le Seigneur des Cieux & de la Ter-
 re, ie vous jure qu'il les a créés; Apres auoir conuain-
 cu ces idolâtres, il a dit, Par Dieu ie feray la guerre à
 vos Idoles, il les a rompus à coup de hache en leur
 absence, excepté le plus grand Idole, auquel il a
 pendu sa hache, & a dit, peut-estre qu'ils l'accuse-
 ront d'auoir rompu les autres; voyant à leur retour
 leurs Idoles rompus, ils ont dit, qui a ainsi traité nos
 Dieux? il est vn impie, nous auons ouïy qu'il y a vn
 ieune homme nommé Abraham qui se mocque
 d'eux, amenez le deuant les yeux du peuple, peut-
 estre qu'on trouuera des témoins de son action; Ils
 luy ont dit, ô Abraham, c'est toy qui as ainsi mal-
 traité nos Dieux, il a dit, au contraire, c'est ce grand

Idole ; Ils ont demandé entr' eux si ces Idoles parloient & s'ils auoient mouuement, apres ils sont rentrez en eux-mesmes, & ont dit au peuple, vous auez tort d'adorer ces Idoles, il les ont renuersez la teste contre-terre, & ont dit, ô Abraham, tu as bien cognu qu'ils ne parloient pas ; il a respondu, pourquoy adorez-vous donc ce qui ne vous peut faire ny bien ny mal ? vous vous salissez de les adorer au lieu de Dieu, ne le cognoissez-vous pas ? Alors ils ont dit, bruslez Abraham & deffendons nos Dieux, si vous estes gens de bien, mais nous auons commandé au feu de perdre sa chaleur pour sauuer Abraham ; ils l'ont voulu tourmenter, & nous les auons exterminés, nous l'auons sauué comme Loth, nous l'auons conduit en la terre de benediction, nous luy auons donné Isaac & Iacob, & les enfans de leurs enfans gens de bien & vrây-croyans, pour enseigner au peuple le chemin de salut, nous leur auons inspiré de faire de bonnes œuures, de faire leurs prieres au temps ordonné, de payer les dixmes, & de nous adorer, nous auons donné à Loth la prudence & la science, & l'auons deliuré des habitans de la ville qui estoient les plus vicieux de la terre, nous luy auons fait grace, parce qu'il estoit homme de bien. Souuiens-toy de Noé, & qu'il nous a cy-deuant inuocé, nous auons exaucé sa priere, & l'auons deliuré d'vn grand peril, & tous ceux qui estoient avec luy dedans l'arche, nous l'auons deliuré de la main des meschans, que nous auons sub-

mergez. Souuiens-toy de Daud & de Salomon, qui rendoient la justice dans le champ où les troupeaux du vilage estoient entrez la nuit sans bergers, nous sommes tesmoins de leurs jugemens, nous auons enseigné la justice à Salomon, nous luy auons donné la prudence & la science, les montagnes nous ont adoré avec Daud, & les oyseaux nous ont loüié avec luy, nous estions avec eux lors qu'ils nous loüioient. Nous vous auons enseigné la façon de semer pour vous garder de necessité, peut-estre que vous m'en remercierez; nous auons commandé aux vents d'obeir à Salomon, & sçauons tout ce qu'il a fait; Les Diables luy ont obey, ils plongeioient dans la mer pour luy pescher des pierres, & traualloient encore en autre chose, & les auons empesché de faire mal aux hommes. Souuiens-toy de Iob, qui a prié son Seigneur, & a dit, ie suis dans vne tres-grande affliction, tu es le misericordieux des misericordieux, nous l auons exaucé, nous l auons deliuré de son affliction, & luy auons donné nostre grace, à sa famille, & à ceux qui estoient avec luy, qui auoient patience, & qui se confioient en moy. Souuiens-toy d'Ismaël, d'Enoc, de Delcafel, & de Zacarie, ils perseueroient à bien faire, nous leur auons donné nostre grace, parce qu'ils estoient gens de bien. Souuiens-toy de Ionas qui a quitté son peuple avec colere, il a crû que ie ne pouuois rien faire contre luy, mais il a crié d'as les tenebres, & a dit. Il n'y a point de Dieu que toy,

*Delcafel,
c'est Elie.
Voy le li-
ure com-
pose par
Abdelba-
ky.*

loué soit ton nom, j'ay eu tort, de t'auoir offensé, nous l'auons exaucé, & l'auons desliuré de son defastre, ie protege ainsi les vray-croyans lors qu'ils m'inuoquent. Souuiens-toy de Zacarie qui a fait son oraison, & a dit, Seigneur ie sçay qu'il n'y a point de meilleur heritier au monde que toy, toutefois ne me laisse pas mourir sans enfans: Nous l'auons exaucé, nous luy auons donné vn fils nommé Iean, & auons rendu sa femme feconde: Tous ces Prophetes s'acheminoient promptement à bien faire, & nous inuoquoient avec humilité, avec desir d'acquiescer nôtre grace, & avec peur des tourmens de l'Enfer. Souuiens-toy de Marie, de laquelle j'ay beny le ventre, nous auons inspiré nostre esprit en elle, & luy auons donné vn fils miracle dans le monde: Vostre loy est vne seule loy, & ie suis seul vostre Dieu, adorez-moy, & ne soiez pas impies, vous serez tous assemblez deuant moy pour estre iugez; le protegeray les vray-croyans qui auront fait de bonnes ceuures, & j'escriray ce qu'ils feront pour les recompenser. Malheur est sur les villes que nous auons ruinées, leurs habitans ne retourneront pas au monde iusques à ce que le passage soit ouuert à Iagog & Magog, & qu'ils viennent courant des lieux esleuez de la terre, alors le iour du Jugement s'approchera, la verité promise ne sera pas esloignée, elle troublera la veuë des meschans, ils diront. O malheur, nous sommes miserables, nous n'auons pas preuë ce defastre, nous auons tres-grand tort d'auoir offensé Dieu. On leur dira, vous n'avez adoré

adoré au lieu de Dieu que les tisons de l'Enfer où vous serez precipitez, si vos Idoles estoient Dieux comme vous l'avez crû ils ne seroient pas entrés dedans l'Enfer, eux & ceux qui les ont adorés seront eternellement damnez, ils gemiront, ils se plaindrôt, & ne seront pas escoutez, ceux qui seront dans le Paradis feront esloignez d'eux, ils n'entendront pas leurs hurlemens, & jouiront eternellement de ce qu'ils desireront, les cris des damnez ne les affigeront pas, les Anges les rencontreront lors qu'ils sortiront des monuments, & leur diront, voicy le iour qui vous a esté promis au monde, iour auquel nous ouvrirons les Cieux & le liurè de compte de tous les hommes, comme nous l'auons promis à ceux qui vous ont precedé, nous effectuons exactemét ce que nous promettons, nous auons escrit en l'ancien Testament, & apres en l'Alcoran que les gens de bien seront heritiers de la terre, ce liure enseignera le chemin de Paradis à ceux qui m'adoreront, nous ne l'auons enuoyé que pour faire grace aux hommes; Dis leur, Dieu m'a toujours inspiré que vostre Dieu est vn seul Dieu, ne luy obeïrez vous pas? s'ils se deuoyent, ie vous ay enseigné comme il les faut traiter; Dis leur, ie ne sçay pas si la punition qu'on vous a promis sera prompte ou tardiuë, Dieu seul sçait tout ce qui est cognu & incognu dedans le monde, ie ne sçay pas s'il vous veut esproouër, ou s'il differera sa punition iusques au temps ordonné, il est tres-iuste Iuge, & tres-misericordieux, il n'est pas tel que vous dites.